



Reglamaint

per trafichar cun veiculs a motor

sün vias da god

Reglamaint per trafichar cun veiculs a motor sün vias da god

As basond sün l'art. 15 da la ledscha forestala (LF) federala, sün l'art. 20 da la ledscha forestala chantunala (LCH) e sün l'art. 16 da l'ordinaziun forestala (OF) dal Chantun approvà da la radunanza cumünala dals 06 gün 1997.

Art. 1 Vias da god

Sco tragets da vias forestalas valan a basa da l'art. 23 da las disposiziuns executivas da la ledscha forestala chantunala las seguaintas vias:

- **Val Sarsura** , davent dal spartavias vers la Val Giarangia
- **Güstizia** , dal cunfin da Susch davent fin sü Chasuot
- **God da Chavazanna** , davent dal spartavias vers la Foura da Marti
- **Munt Baselgia** , davent dal spartavias vers Vallatscha
- **Pignai** , davent da la via chantunala
- **Vallainas** , davent da Val Raschitsch fin pro la piazza da volver dal Crap da Sarasin
- **God da Carolina** , davent da la punt da la Val Tantermozza
- **God da Brail** , davent da la storta da la Val Punt Ota

Art. 2 Permiss da circulaziun per veiculs a motor

Permiss generals chi valan tuot l'on per tuot las vias vegnan concess per bsögn da l'economia agricula, forestala ed alpestra. Veiculs a motor cun permiss da tuot on vegnan marcats cun üna vignetta chi'd es da fixar bain visibla vi d'üna fanestra dal veicul. La vignetta nun es trasmissibla e vala be pel veicul admiss.

Ils ulteriurs permiss sun limitats areguard il temp e's referischan ad ün traget da la via da god circumscrit o ad ün'attività specifica. Il permiss vain concess cun üna carta chi cuntegna las indicaziuns bsögnaiplas: nr. da l'auto, via(s) da god, d'ürada, attività. La carta nu po gnir dovrada per oters veiculs; ella ha da gnir exposta aint il veicul da maniera visibla.

Art. 3 Restricziuns generalas

Per la via da god da Munt Baselgia vala üna limita da pais da 12 t, per quella da Güstizia 16 t. Sün las otras vias da god as po transir cun pais da fin 28 t. Per camiuns cun daplü co 3 aschigls bsögna ün permiss excepziunal da la suprastanza da cumün.

Per tuots veiculs a motor vala sün tuot las vias da god üna sveltezza maximala da 30 km/ura.

Art. 4 Excepziuns da circulaziun sainza permiss

I nu fa dabsögn da permiss per:

- a) tuot ils viadis da servezzan da pulizia, dal servezzan forestal, da las guardgias da sulvaschina e dal Parc, da la sanità, dals pumpiers, da las guardgias d'öli e da chemia, viadis per accumplir activitats officialas o legalas (p.ex. spazzachamin, inspecziun da la cumischiun da fö, tribunal per visitas ocularas etc.), viadis i'l servezzan dals differents uffizis e viadis da lavur da las OEE;
- b) viadis da meidis e da veterinaris in actività professiunala;
- c) viadis ordinats d'ün post cumpetent in occasiun d'accidaints e da catastrofas;
- d) per transports da sulvaschina ad unglia sfessa gnüda schluppettada e per viadis colliats culla chatscha da selecziun da capricorns e culla chatscha speciala da tshiervis e chavriöls;
- e) maschinas da loipas per preparar tragets da loipas da passlung sün vias da god.

Art. 5 Excepziuns cun dumonda da permiss

Sün dumonda vegnan concess permiss da circulaziun per:

- a) garantir l'access a stabels e chamonnas per proprietaris e fittadins;

- b) pussibilitar transports da furniziun a glied da professiun, ad usters da chamonnas, a concessiunaris eui. per exercitar lur actività professiunala;
- c) far visitas a la pastraglia o ir in visita sün chamonnas e/o per güdar pro lavuors agriculas o da god
- d) trasportar a persunas chi sun impedidas
- e) exercizis ed examens cun chans da nüz
- f) ir a far e trasportar romma e laina dad arder. Ils permiss necessaris vegnan concess dal silvicultur cumünal.

Art. 6 Taxas

Las taxas pels permiss sun regladas aint il l'orden da taxas dal cumün da Zernez. In cas motivats po la suprastanza cumünala conceder ün permiss gratuit.

Il permiss per 1 di vala per ir e tuornar. El es valabel in maximum 3 dis a partir da la data d'emissiun.

Ils permiss vegnan concess da la cancellaria cumünala cun excepziun dals transports colliats cun tagls da laina ed otras lavuors da god chi vegnan dattas dal silvicultur cumünal.

Art. 7 Prescripziuns specialas

La suprastanza po scumandar tuot ils viadis in cas da relaziuns disfavouravlas obain relaschar restricziuns per ün tschert temp e/o per tschertas categorias da veiculs.

Dal territori da las vias cunfinantas cul terrain da god nu das-cha gnir fat adöver cun veiculs. Parcar e cruschar das-chan succeder be in lös previs ed adattats perquai.

In cas da dons causats tras abüs da las restricziuns da quist reglamaint pon ils chaschunaders gnir fat respunsabels pels dons.

Art. 8 Disposiziuns penals

Cuntrafacziuns a quist reglamaint vegnan chastiadas da la suprastanza cumünala cun multas fin a frs. 1'000.—, in cas da repetiziun fin a frs. 5'000.—.

Schi vain fat maladöver dal permiss, schi po quel gnir annullà temporar- o definitivmaing.

Art. 9 Execuziun

L'execuziun da quist reglamaint suottastà a la suprastanza cumünala. Ella po delegar singulas cumpetenzas a funcziunaris cumünals.

Art. 10 Publicaziun e signalisaziun

Las excepziuns e las restricziuns da trafic relaschadas cun quist reglamaint sun da publicar. La signalisaziun ha da gnir fatta in perincletta culla pulizia da trafic chantunala.

Art. 11 Entrada in vigur

Quist reglamaint aintra in vigur davo cha'ls signals da prescripziun sun gnüts approvats dal departamaint da güstizia, pulizia e sandà e davo cha la signalisaziun es gnüda installada al lö (art. 13 al 2 da l'ordinaziun executiva dal Grand Cussagl, OEGC, pro la ledscha federala da trafic sün via LTV).


Lö e data: Zernez, 23 gün 1997

COMUNITA DA ZERNEZ

Il president:

L'actuar:

G. B. ...



...